

愚

齋

存

稿

愚齋存稿卷第十九目錄

郵傳部奏疏上

裁汰正大鐵路華洋員司摺

川漢路綫援案穴垣通軌摺

廣西柳邕電綫保案礙難照准摺

派員查勘雲南鐵路摺

臚陳分年籌辦郵政情形摺

清單並附

派查湖南湖北路工暨股捐情形摺

撥還英公司借款片

臚陳本部第四屆籌備成績摺

派勘廣西路綫分別緩急情形摺

各省官電歸部辦理酌擬辦法摺

遵章預陳次年籌備實情摺

議覆籌辦新疆甘肅鐵路情形摺

部臣迴避請旨摺

交通銀行派員查帳摺

奉直地方驗疫擬派醫隨車查驗摺

山東省沿河電綫請准循舊管理摺

議復東省檢疫所經費無從協助摺

第二次交通統計表并各政紀要繕冊呈進摺

臚陳本部第五屆籌備成績摺

擬訂大東大北電報公司預付報費合同摺

密陳大東大北公司預付報費用款情形片

改派交通銀行總理幫理片

籌辦商船學校大概情形摺

上海實業學堂購置民屋地畝需用銀兩片

愚齋存稿卷第十九

郵傳部奏疏上

裁汰正太鐵路華洋員司摺

宣統二年七月

奏爲陳明裁汰正太鐵路華洋員司業經辦理就緒情形恭摺仰祈

聖鑒事竊維正太鐵路自行車以後因貨源短絀釐稅頻繁以致歲負鉅虧業經迭次奏陳在案年來臣等熟籌補救之策除開通運道招徠客商減免釐稅各項業已隨時籌商辦理外竊思鐵路政策固重開源而用款浩繁節流亦不容緩正太鐵路事權牽制於借款公司

之手洋員恆居多數失權糜款窒礙殊深亟應及時整頓以挽事權惟彼此權限平均積習既深自難猝變必須善爲操縱乃可漸就範圍去年經飭鐵路總局局長相度籌辦去後旋據將裁撤華洋人員列單呈報計自去年以來先後裁撤本路華員四十四人洋員二十三人每年節省薪費銀元三萬一千七百餘元另法幣十三萬四千七百佛郎其駐巴黎借款公司洋員亦自西歷本年起裁撤工程司工程參贊等員計每年又省法幣二萬佛郎均經借款公司函允照辦此外修養工程添購材料皆分別情形設法核減卽該路每月向解辦

公經費一項計銀二千五百兩亦令自本年正月起改
爲折半繳交以資表率等情前來經臣部覆查無異分
別准照辦理除飭該局長仍隨同督飭員司招商利運
以冀增益進款外所有整頓正太鐵路裁汰華洋員司
緣由理合恭摺具陳伏乞

皇上聖鑒謹

奏 本月二十一日奉

旨知道了欽此

川漢路綫援案穴垣通軌摺宣統二年八月鄂督瑞

會奏

奏爲川漢路綫擬請援案穴垣通過恭摺會陳仰祈

聖鑒事竊據四川川漢鐵路公司呈稱查川路現自湖北宜昌開工建築由宜昌至歸州屬之香溪地方計長約三百里原分九段業經陸續興修頃因趕辦工程擬從香溪以上接展勘築以期速成據工程司稟稱此次測勘香溪至東瀼口情形歸州城形甚扁南垣直臨江岸北垣已達山腰如路越城南附近民房甚多且灘石林立不獨工程浩大並恐無處取土城北則路綫太高無法繞越惟由東門之北關洞入城由城隍廟文昌宮

後經過係沿江岸山腹順地形而折入城內恰有餘地
所拆民房無幾是誠天然路綫等情歸州附城一帶環
繞皆山經該工程司履勘無從繞越勢須闢洞入城尙
幸路綫所經地頗空曠民房無多自應會同地方官酌
量辦理惟事關穴城通過請分別奏咨立案並具草圖
呈核等情到部并准四川總督咨同前因當經郵傳部
咨由 臣 瑞澂轉飭歸州知州詳細查覆茲據稟稱會同
川漢鐵路公司邀集紳首逐一查勘其原勘之路綫從
東門之北闢洞入城由城隍廟文昌宮後經過係順地
勢從山腹而入城內地頗空曠民房亦少所拆無幾各

廟祠宇相隔路綫約五六丈之遠地勢民情均無妨礙等情查路綫所經與城相值苟非萬不得已自應設法繞越惟該城形屬橢圓適當路衝檢閱來圖南垣以外直臨江岸地窪灘仄水潦堪虞北垣以外高逾南垣約三十丈許水平相差其度過遠高低失度目前建築已是款鉅工艱將來行車尤覺諸多危險查浙江鐵路分綫入城一案於光緒三十二年經郵傳部核議奏奉

諭旨允准在案現該州路綫所經逼於地勢委難繞越復經查明與民房祠宇均無窒礙擬請准其援案辦理以資妥善而利交通所有川漢路綫擬照成案穴垣逼

過緣由謹恭摺會陳伏乞

皇上聖鑒訓示再此摺係郵傳部主稿會同湖廣總督
臣瑞澂辦理合併聲明謹

奏 本月初一日奉

旨依議欽此

廣西柳邕電綫保案礙難照准摺

宣統二年八月吏部會奏

奏爲遵

旨議奏廣西展設邊防柳邕電綫保案礙難照准請

旨遵行恭摺會陳仰祈

聖鑒事內閣鈔出廣西巡撫張鳴岐奏添設邊防柳邕電綫工竣在工出力各員遵

旨擇尤酌保一摺又知縣陳禮章請卹一片宣統二年七月十八日奉

硃批該部議奏單片併發欽此欽遵到部查原奏內稱廣西電綫因就邊防畫分東西兩路東路添綫計長六

百七十五里西路添綫計長一千零六十里由柳至邕
添綫計長六百一十里各綫所經多屬峰重嶺複林密
菁深在工各員鑿險施工備嘗艱苦卒使二千三百餘
里電綫陸續告成費省工堅大裨邊務前經援案奏奉
溫綸准予擇尤酌保茲據電報總局總會辦將在工出
力各員開具銜名履歷具詳前來臣逐加查核毫無冒
濫相應仰懇

天恩俯准照擬給獎等語郵傳部查保獎電綫工程人
員如光緒九年十一年兩廣創設邊防電綫光緒二十
六年滬商安設

行在電綫或在開創之始或係

蹕路工程自不得不略予獎勵以資激勸嗣後風氣大開綫路日增無論邊省腹地辦理電工均未奏獎有案自臣部收回商電以來每年展拓電綫不下三四千里卽如貴陽至興義太原至歸化張家口至庫倫以及東三省之營鳳奉臨等處皆係地當邊要綫路綿長在事各員備極勞苦均未奏請獎勵良以推廣路綫靡歲不有此端一開寔有獎不勝獎之勢此次廣西展設電報獎案在該撫原爲激勸人員起見而臣部統籌全局辦法必須一律如果照准則各處辦理工程各員勢必紛

紛援引而現在開辦之科布多至新疆綏來電綫施工之難倍於廣西又將何以給獎惟此案係於宣統元年六月欽奉

諭旨准其酌保數員自應奏明請

旨應否將該撫奏保展設廣西電綫獎案一摺又知縣陳禮章請卹一片一併無庸置議之處恭候

欽定所有遵

旨議奏緣由謹恭摺會陳伏乞

皇上聖鑒訓示再此摺係郵傳部主稿會同吏部辦理合併聲明謹

奏 本月十一日奉

旨依議欽此

派員查勘雲南鐵路摺

宣統二年八月

奏爲派員查勘雲南鐵路恭摺仰祈

聖鑒事竊查本年五月初十日

臣部會同度支部議覆

雲貴督

臣

李經羲奏籌辦滇省鐵路情形案內業經擬

准如原奏所稱先從籌修滇桂入手滇蜀一路經前督
臣丁振鐸奏准亦應派員履勘等因奏明奉

旨允准在案正在遴選熟悉工程人員以便派往復准
雲貴總督電稱騰越鐵路英人催辦甚急擬先查勘等
語查光緒二十三年中緬條約第十二條附款載明中
國答允將來審量在雲南修建鐵路與貿易有無裨益

如果修建卽與緬甸鐵路相接等語嗣後英使復欲援
照滇越辦法經外務部駁阻始允由滇至緬中英兩國
各修各路茲旣據該督電稱英人催辦甚急自應一併
派員先行履勘並查明該處貿易情形茲查有候選道
羅國瑞路工專門習勞守樸堪以派往查勘滇桂騰越
二綫並派臣部郎中賀良楹會同前往與地方官接洽
一切其滇蜀一綫恐兼顧不及致延時日卽由雲貴總
督飭令滇蜀公司前僱之工程司履勘仍著該員等就
近督查似此分任勘查庶期早日竟事至勘路所需薪
費滇桂騰越由部省攤半分認滇蜀則由雲南籌付恭

候

命下卽由臣部分行遵辦所有派員查勘雲南鐵路緣
由謹恭摺具陳伏乞

皇上聖鑒謹

奏 本月十一日奉

旨

臚陳分年籌辦郵政情形摺

宣統二年九月

奏爲分年籌辦郵政繕具清單恭摺仰祈

聖鑒事竊查

臣

部職掌交通凡船路電郵四政在在均

與推行憲政有密切之關係必期交通機關組織完備而後庶政敏活消息靈通所有路政分年籌辦事宜及關於船政電政辦理情形均經陸續奏報在案郵政一項爲無形交通之大端於憲政精神關係尤鉅東西各國近數十年於此項政務銳意講求竭力推廣一國大小郵局多至數萬處所旣以宣達上下之情消除隔閡之弊且於匯兌儲蓄等事罔不周備國家人民交受其

益我國郵政開辦之初權由稅務司兼理十數年來規模粗具查憲政編查館奏定行政綱目規定臣部郵政司掌全國郵政註明郵政局現在由稅務司辦理亟應改歸臣部又查上年八月憲政編查館會同復核各衙門九年籌備清單內開郵政附屬稅務司本在未設專部以前風氣未開暫歸兼轄今既有專官自應責成該部堂官會商稅務大臣籌備收回方法以符名實各等因均經奉

旨允准是臣部職司所在責無旁貸當此籌辦憲政之時自應力圖推廣以臻完備惟其事務繁多整理不易

且與各衙門多有關涉事件所有交接之次序權限之劃分以及對於國內推廣局所與匯兌儲蓄辦法對於國外行駛郵船與定約人會等事非一一預爲籌及不足以臻完密自應酌量情形分別緩急將一切應辦事宜按年籌備開列清單及時陳定以便與各處互相接洽而臣部亦可按期程功免滋貽誤庶冀郵務日有起色於憲政前途實多裨益所有分年籌辦郵政情形除咨憲政編查館並俟接管後將辦理事宜隨時具奏外謹繕具清單恭摺具陳伏乞

皇上聖鑒訓示謹

愚齋存藁

卷十九

制誥奏疏

七

愚齋存藁

奏 本月初一日奉

旨依議欽此

謹將分年籌辦郵政清單恭呈

御覽

計開

宣統二年

籌辦接管郵政事宜

調查從前及現在辦理情形並經費等項又各國郵政辦法章程籌

備一切經費並各色郵票

與稅務處協商交接郵政事宜

編訂郵律及一切規則

採各國通行之郵律先行編訂奏明辦理

設郵電班於交通傳習所

派學生赴奧學習郵政

以上二項均已奏明辦理

籌畫郵政經常及推廣所需經費按每年郵稅所入以公雜費而以其餘一分爲推廣經費

籌備歸併驛站辦法

宣統三年

頒布郵政新章以後按年修改訂價出售

釐定郵政職分並薪俸考試任用章程

規定各省總分局設立處所從前多係按稅務區域改設

派員赴萬國郵政公會並考察各國郵政購郵信蓋印機器數具發

交工廠仿造以便發各省總局應用

奏設劃一郵政應用圖記各項物料所

籌辦郵局儲蓄事宜

儲蓄一門在我國爲尤急

籌辦外洋郵船

宣統四年

入萬國郵政公會

與各國提議裁撤客局

宣布郵律

裁改各處民信局

推廣各府州縣二等郵政局

訂無法投遞信件辦法

各國特設有專局以辦此事並付以拆信權此外無論何員均

不得拆閱訂爲專律

籌辦蒙古西藏郵局

開辦外洋郵船

開辦各省郵局儲蓄

宣統五年

推廣各郡縣鄉鎮三等郵政局

設郵報

專載郵局事實每七日一發行不出售

開辦郵局電匯

宣統六年

與各國分別訂立保險郵件及匯兌條約

推廣蒙古西藏郵局

設機器工程局

各局需用機器甚夥非專設局製造必有供不應求之勢

宣統七年

開行郵政特別快車於通商口岸

凡經過零星小車站用機器收發包封而

車不停亦

各行局

推廣四等郵政局於京外各街衢

由殷實鋪戶代辦

推廣匯兌儲蓄兩項於各省二三等郵政局

宣統八年

發行立憲紀念郵票

推廣郵政火車局附設於各路特別快車後

推行郵局電匯並保險信件於五洲郵會諸國

派查湖南湖北路工暨股捐情形摺

宣統二年九月

奏爲派員查明湖南湖北路工暨股捐各款情形恭摺

仰祈

聖鑒事竊

臣

部於本年七月二十一日具奏派員前往

湘鄂勘路查款一片奉

旨知道了欽此當卽欽遵分別辦理去後旋經該員等先後稟復前來據赴湘委員呈稱粵漢鐵路在湘省境內計長一千二百餘里路綫先經合興公司勘定約需公費銀二千八百餘萬兩另須籌還贖路借款本息及未贖回之美國金元小票利息湘攤七分之三約需銀

五六百萬兩上年四月開開築長沙洙洲一段長一百五里如改良鑿洞辦法年內或可竣工通車其收支款項自光緒三十一年二月開辦起截至宣統二年七月底止除去息借周轉銀五十九萬三千餘兩不計外計收入優先股銀元一百七十二萬餘元合之租股及米鹽雜捐三佛枝路餘利折合銀共三百八十五萬六千五百九十二兩八錢四分計支出付還本息及工程各項費用銀三百四十八萬七千四百八十七兩五錢九分收支兩抵現實存銀三十六萬九千一百五兩二錢五分至其集股收捐之法分爲六宗一爲湘民認繳之

優先股一爲隨糧帶征之地方租股一爲出境米捐一爲衡永寶三府淮鹽溢引之配銷捐一爲本境行銷各省食鹽加價之鹽捐一爲供差員薪派捐股票近由諮議局議決者二宗一爲累進租股係按原有租股層遞加扣一爲房租股係每年派捐一月房租入股是其正式股捐祇有優先股之一百七十二萬元確係商業性質其餘各項派捐或先經奏准或甫議定雖皆有案牘可稽實皆涉於懸擬復據赴鄂委員呈稱鄂境川漢路綫前由官局勘明計一千七百餘里約需工費銀元六千萬元又鄂境粵漢路綫前由官局勘明五百餘里約

需工費一千六百萬元皆尙未實測興工所有以前官
籌之款收支兩抵現存不及萬兩上年冬閒湖北紳商
設立勸股協會目前據報繳股銀元九十六萬四千二
百餘元祇驗得漢口大清交通兩銀行存有六十三萬
二千四百餘元工旣未興款僅得此商民之力已見一
斑各等語臣部詳加考核均屬實在情形所有派員分
赴湘鄂查明路工款項緣由理合恭摺具陳伏乞

皇上聖鑒謹

奏 本月十二日奉

旨

撥還英公司借款片

宣統二年九月

再光緒三十四年二月

臣

部以官辦各路需款接濟經

奏明向英公司借銀一百萬兩訂立合同以十四箇月爲期俟京漢京奉得有餘利按期如數歸還等語奉

旨依議欽此欽遵在案嗣因各路餘利不敷應付經與該公司展借十五月減輕利息分期清還至本年九月又屆限滿當由臣部向交通銀行暫行挪撥歸款合同註銷作廢所有交通銀行暫挪之款嗣後仍由路利項下撥還除分飭辦理外理合恭摺具陳伏乞

聖鑒謹

愚齋存稿

卷十九

垂音考

七

奏 本月十二日奉

旨知道了欽此

臚陳本部第四屆籌備成績摺

宣統二年十月

奏爲遵章臚陳本部第四屆籌備成績恭摺仰祈

聖鑒事竊查憲政編查館奏定考核章程內開九年籌備事宜責成內外臣工每屆六箇月將籌備成績臚列奏聞並咨館查核等因所有臣部九年籌備事宜暨第一第二第三兩屆籌備成績迭經奏咨在案茲值第四屆奏報之期自應遵章臚陳以符憲典伏維臣部所轄四政自除郵政暨理船廳尙未移交外其餘船郵成績業經上屆陸續陳明茲請就路電二門分爲補救擴充兩端縷晰陳之路政自前年續回京漢以後所有大賠款攬

保款項一事

臣

部飭鐵路局長迭與比公司爭辯未決

經外務部與駐京比使公斷始將憑函作廢本年業經奏明完結正太舊因窄軌之故以致稅繁貨絀歲受鉅虧經部飭令路員製用活軸貨車俾得轉運煤斤於京漢旋復裁撤本路華洋員役巴黎公司之工程參贊等員計歲省銀元三萬一千七百餘元並省法幣十五萬四千七百佛郎兼令該路將月解公費銀二千五百兩亦折半解部以資表率總期寓節流於開源之內俾獲日起有功而汴洛之洛河橋墩亦於六月閒趨築葺役其吉長軌綫與南滿軌綫交接之法業與議訂聯絡營

業章程其大要則西起吉長之伊通河東起南滿之頭道溝別築一聯絡之綫劃定區域以便裝卸客貨所有兩站界內建築之費彼此分任而吉長於該綫則獨任其修養而專有其管理之權權利挽回頗非淺鮮至電政如贛浙福詔詔廣及鄂境老河口豫境鄭州之大修各役均分途趕辦而英人在上海所設匯中旅館之無線電報亦次第收回此臣部籌備成績之在補救者也查全國官建各路其現在興築者曰張綏曰廣九曰吉長曰津浦曰開海清徐開海早經分道測量大概情形上屆曾預爲陳奏張綏自張家口至柴溝堡六站之內

橋墩涵洞先後竣工近且接展而前冀達天鎮廣九則購地局所已撤第一段通車約六十里之譜第二段大橋三座築墩早畢第三段路基一律告成吉長則全路土工除橋洞外完者居十之八現准督辦津浦大臣咨稱該路北段從天津抵濟南軌木土方將次蕝事其餘五段亦經逐段興工南段自浦口至於臨淮料車早已暢駛自臨淮至於固鎮路基亦已築完而固鎮宿遷嶧縣各段之間或初施鋪軌之工或甫竣購地之役現正兼程趕造期速觀成等語而其電綫之展設者除奉吉經部咨行各該省辦理外於河南則有武安之綫於安

徽則有六安之綫於福建則有汀漳之綫於江西則有
吳城廣信之綫於山西則有歸化包頭之綫於皖蘇閩
則有鳳陽徐州之綫於廣東則有潮州嘉應之綫更由
嘉應分綫並出東經小河口以達於平遠西經官塘以
達於興甯而川藏二千數百里間自察木多以東起巴
塘業經興修自察木多以西訖江孜正資籌辦此臣部
籌備成績之在擴充者也總之郵傳四政義主交通其
用財皆殖產營業之基視尋常銷耗爲有別其立法兼
強國富民之計較他項運輸爲不同臣等先後設施雖
緩急或因時爲變通而宗旨所歸究無逾此所有遵章

臚陳本部第四屆成績各緣由除分咨外謹恭摺具陳
伏乞

皇上聖鑒謹

奏 本月初二日奉

旨

派勘廣西路綫分別緩急情形摺

宣統二年十月

奏爲遵

旨派勘廣西鐵路路綫並分別緩急情形恭摺仰祈

聖鑒事宣統元年四月十八日軍機處片交廣西巡撫
張鳴岐奏廣西鐵路關係緊要詳籌切實辦法一摺奉
硃批著郵傳部先行揀派委員前往查勘該全省鐵路
應從何處開辦分別緩急次第修築妥籌辦法詳議具
奏欽此欽遵到部當卽遴選員司奏派前往確實測勘
在案查廣西全省鐵路應分二大幹綫自桂林之東北
經靈川與安全州而達湘粵交界之黃沙河是謂桂全

綫自桂林之西南經永福雒容馬平來賓遷江賓州上林而達南甯府之宣化縣是謂桂邕綫該兩綫先後經該撫暨委員等將圖說估單咨報到部伏查桂全路綫長三百餘里估需工款六百六十七萬九千四百兩桂邕路綫長八百里估需工款一千七百六十六萬二千兩造路時利息在外似此工程浩大勢難併力兼營自應分別緩急次第修築方爲得策第兩路之中究應先修何綫自不能不詳加規畫妥爲籌定竊以路工辦法必先由內及外由幹達枝方能首尾銜接脈絡貫通桂邕一綫原奏係爲籌備該省邊防注重行軍後路起見

惟該路綫長工艱需款至鉅若不上接桂全右通滇省
就令成立仍屬孤懸設有緩急腹地兵力不能直注邊
陲轉與桂林省垣不無牽掣惟桂全一綫實爲腹地交
通之路工程較短成本較省集款施工尙易爲力現在
粵漢已議籌築將來長衡永全循序漸進由全至桂一
氣相承以形勢論無枝幹凌躡之虞以軍用論有輔車
兼資之益以營運論有貿遷化居之便是該省路綫其
最急實在桂全一綫臣等再四籌議擬令先辦桂全一
俟安定辦法另行具奏至於桂邕一綫旣爲注重邊防
且與滇桂一綫聯絡亦有關係現正派員測勘滇桂路

綫應俟勘竣後再行詳擬辦法所有遵

旨議覆廣西鐵路路綫分別緩急各緣由理合恭摺覆
陳伏乞

皇上聖鑒訓示再此摺因派員履勘往返需時是以覆
奏稍遲合併聲明謹

奏 本月二十二日奉

旨

各省官電歸部辦理酌擬辦法摺

宣統二年十二月

奏爲遵

旨將各省官辦電報歸部辦理以昭劃一謹酌擬辦法
恭摺仰祈

聖鑒事竊准憲政編查館咨稱會奏覆核各衙門簽注
行政綱目一摺宣統二年十月初四日奉

旨著依議欽此恭錄咨行到部查行政綱目郵傳部職
掌內開各省現辦之官電局應一律歸部辦理等因伏
維電報之設義重交通必須有居中馭外之樞機乃能
收指臂相聯之實效考諸東西各國辦理電報靡不集

權中央用能界限分明事權歸一中國電報係官商分
辦商辦業經臣部收回官電仍由各省自辦彼此畛域
未能劃一是以臣部具奏分年籌備要政摺內曾將官
電歸併妥籌布置陳明在案現在釐定職掌各專責成
既經憲政編查館奏定一律歸部辦理自應遵照實行
惟是官電散布各省綫路之長幾與原有商電道里相
埒經費向多不敷酌劑尤非易事何況劃分日久合併
較難當此接管之初若不竭力經營妥籌善法恐不免
支絀紛更之弊臣等公同商酌謹擬辦法爲我

皇上陳之一官電綫路現計四萬餘里歷年旣久朽壞

居多雖經各該省隨時整頓而應行大修之處仍復不
少本年臣部派員調查兩廣綫路業將亟須修理情形
咨行該省核辦至今尙未興工其餘滇桂之綫與英法
相接東三省之綫與日俄相接管理偶疏卽生交涉而
川藏回疆陝甘等處又係關涉邊防應俟接收後由臣
部遴派委員實力查勘酌量財力之盈虛分別工程之
緩急分年修理逐漸布置以期日臻上理一臣部自收
贖商電以來每年推廣綫路絡繹不絕需用經費動逾
累萬良以要政攸關不得不勉爲籌畫一經接收官電
展綫工程事更繁於往昔若專就電款挹注辦理必形

竭蹶查近來添設歸太阿綏貴洪各綫或係臣部與該省分成攤認或由度支部撥款協濟嗣後遇有展綫工程擬仍由臣部酌核情形照案辦理庶較易集事不致貽誤要工一臣部所轄電局凡傳報等次及收費辦法向有一定章程而一等官電半價惟紫花印各衙門有寄發之權其餘官報概列四等收取全費原以示限制而分緩急立意至爲深遠惟官電省分收費既有參差等次亦不免紊亂稽核甚難關係於款項者固鉅影響於報務者尤大擬自接收後凡官電省分督撫以下發遞因公官報核定等次分別納費並請准其作正開銷

庶與臣部定章相符以杜紛歧而昭一律一官電省分
邊郵居其多數既鮮商報收款必絀是以局用修養諸
費悉由各省另籌官款以資彌補嗣後不敷之款既經
歸部直轄臣等總當勉爲籌畫極力維持以免貽誤至
從前官商劃分之時各省互有欠借北洋東三省等處
有借用電政之款商電有欠解天津工程局之款現在
悉歸部辦部省款項同關

國帑應俟接收以後概將舊案撤銷以清糾葛一官電
敷設區域如直隸江南廣東山東等省會均經臣部設
有電局而各該省又復另設總局當時雖因官商分辦

不得不各清界限而同在一地分立兩局情形等於駢枝經費亦不免虛耗擬自接收後酌核歸併如有各分局子局收費無多綫路非關緊要可以遞改報房之處亦當酌量改設實力撙節一官電常年收支經費如新疆陝甘廣東山東等省均有冊報到部其餘各省互有遲早廣西則歷年均未造報所有未報各案截至宣統二年年底止應由各該省趕緊清理造銷自接管以後由臣部將一切表冊格式頒發各局明定期限飭令分別填報俾得按年奏銷以清款目此外整頓各節如鄭重接轉綜覈收支造就學生選派工頭與夫一切管理

稽查方法皆爲電政切要之圖應俟接收後由_臣等察核情形切實辦理如蒙

俞允恭候

命下由_臣部分行各省督撫遵照卽自宣統三年正月
起一律辦理所有遵

旨將各省官電歸部辦理酌擬辦法緣由謹恭摺具陳
伏乞

皇上聖鑒訓示謹

奏 本月初二日奉

旨著依議欽此

遵章預陳次年籌備實情摺

宣統二年十二月

奏爲遵章預陳次年籌備實情恭摺仰祈

聖鑒事竊准憲政編查館咨開續奏籌備摺內稱各部院籌備事宜實爲行政準的擬請每年冬閒由該管衙門按本年原奏清單將擬定次年實行辦法先期切實奏明但使所籌克赴準的縱與原單略有出入不妨聲明請

旨等語

臣

部所擬九年籌備清單暨第二第三第四各

屆籌備成績迭經奏咨在案茲將擬定次年籌備實行辦法謹遵章一一陳之查

臣

部四政以鐵路爲最繁重

已成之路惟京漢京奉具有東南兩幹之宏規所收利益亦厚滬甯汴洛正太尙未聯合成幹而粵漢爲南幹要樞急宜興工臣等正在詳細籌商期歸妥慎至廣九首段運輸業已通行預計明年夏秋之交當與英人軌綫相接川漢自宜昌啟築而後其土工已抵獅子口吉長則吉林卡倫一段近始通車而長春鋪軌之工明春亦能蒞役津浦則北段之濟南河橋挖築伊始南段浦口臨淮關等處料車亦已開行該路合同訂明宣統四年告成現准該督辦大臣咨稱兩段路工明冬即可銜接此外西行兩綫以款項論則正太所借法款計本金

酬費共四千零十萬佛郎按照合同從今年起可以提
前全數清還一俟籌有端倪當卽奏明辦理以工程論
則張綏之軌已達天鎮現正飭令該總辦等督同在工
員役接築而西其腹地各綫開海方資籌款洛潼甫報
興工其餘陝西之西潼山西之同蒲均應如期督催以
符原案此臣部實行籌備路政之辦法也其電政一門
現擬試辦電氣製造工廠暨沿海無綫電報業飭局員
妥議而所有綫桿之應行修理者計山東河南江蘇安
徽湖北四川六省境內共五十二處其應增設者於山
東則擬自青口展至膠州於陝西則擬自西安展至漢

中於河南則擬自南陽展至汝州於江西則擬自吉安展至萍鄉於四川則擬自自流井展至瀘州於湖北則擬自白洋展至宜都於湖南則擬自洪江展至永州更擬自張家口展至大同以聯直晉自周家口展至亳州以聯豫皖自壽州展至徐州以聯皖蘇自松江展至嘉興以聯蘇浙自廣信展至浦城以聯贛閩其餘應展應接之處尙須隨時增設此_臣部實行籌備電政之辦法也郵政自上屆遵照憲政編查館續奏責成_臣部事宜清單籌辦以後本年九月間復經部按照行政綱目奏擬分年辦法已迭與稅務處商議定期接收其郵便儲

金一門上屆經奏明分咨出使大臣揀派學生赴奧練習現又派員往日本調查方法以期早日開辦驛站一門現正與陸軍部籌商歸併其如何裁驛增郵及如何郵電合一之處俟歸併後卽當次第設施船政如公司註冊給照章程早經舉辦而檢查船舶考核船員一切規則亦擬逐漸編訂仍應於新修航律內規定畫一俾臻完全其理船廳暨民船各項事宜旣經行政定入臣部職掌之中正擬遵與稅務處農工商部將權限劃清以圖共濟一面提倡郵船會社冀得漸收海權並擬於上海實業學堂中之船科切實擴充俾就近於吳淞歷

練沙綫風濤以收實用此臣部實行籌備船郵二政之
辦法也惟源與流之開節不能當則何以驗將盈補絀
之功國與民之隔閼不能通則何以收以速補遲之效
此臣等所所夕焦慮者也所有遵章預陳次年籌備案
情各緣由除分咨查核外謹恭摺具陳伏乞

皇上聖鑒訓示謹

奏 本月二十五日奉

旨

議覆籌辦新疆甘肅鐵路情形摺

宣統三年正月
支部會奏

奏爲遵

旨議覆籌辦新疆甘肅鐵路情形恭摺會陳仰祈

聖鑒事本年十一月十八日陝甘總督長庚奏新疆關
係緊要擬請借款接修歸新鐵路一摺欽奉

硃批該部議奏欽此又奏甘肅鐵路力難自辦擬請借
款修築一摺同日奉

硃批該部議奏片一件併發欽此欽遵由軍機處抄交
到部原奏內稱京奉京漢東南兩幹已具宏規現辦張
綏北幹亦有基礎獨歸新西幹尙付缺如若不兼籌斯

路工難語完全卽邊防末由連合茲擬定歸新路綫由歸化而包頭鎮而札克蘇吉而土布齊而蘇吉而三塘湖至古城共六千一百七十里由此至新疆省城僅六站果借外債數千萬金分段趕築期以十年西陲猶可爲也又稱張綏洛潼皆可接通隴綫惟陝西乾永一帶崖谷糾紛由平涼經六盤青嵐等山尤屬陡險若取道包頭鎮自靈州達蘭州路較平坦計里二千餘里需銀二千數百萬兩甘肅貧瘠萬難自修與其路權終落他人何如借款辦理原片內稱甘肅應修南北二路北路由靈州至包頭鎮南路則俟西潼通後由西安歷寶雞

三岔秦州伏羌甯遠至狄道距蘭州僅二百一十里若
再西達甘涼抵安西州於勢尤順此爲將來計畫併先
密陳各等語郵傳部查新疆爲古之西域天山之野厥
產琳琅煤鐵森林所在皆有其壤周迴二萬餘里前鄰
青藏後倚蒙古漢唐以來均極力經營直至準回跳梁
屢經

聖武丕張始克等諸腹省誠要區也近年俄屬軌道迫
近伊犁英屬居民漸踰蔥嶺欲綢繆於未雨鐵路實其
要圖甘肅跨有祁連礦產之利毛氈之材頗稱饒裕祇
以道修運阻生計日艱而其地左右於川陝青蒙之間

自西徂東於新疆實爲後盾欲營新路則甘路尤在所
先該督於殖民行軍籌之綦詳甘新形勢誠屬瞭如指
掌惟查鐵路性質約分爲二內地則計貿遷邊境則重
徵調而二者爲用又實相因蓋將來之修養不足經常
何以支撐幹枝之聯絡未通緩急奚能適用臣部於光
緒三十三年七月間奏定中國軌綫全圖西幹自京城
歷潼關蘭州以達伊犁北幹自京城歷張家口庫倫以
達恰克圖北枝自庫倫抵科布多西枝自太原歷大同
至張家口與北幹相接業經奉

旨允准在案所定西幹係由中原以達邊要軍用營業

方足相資又以北枝兼顧蒙古是西北等路

臣部

未嘗

不籌及也原奏於歸新一路所謂五便僅就路工節省

而言究竟修養之資日後有無把握尙未確實調查應

俟籌有的款實行開辦時詳細測勘何者爲宜再行核

定至所擬甘肅兩綫一繞靈州一繞寶雞似不如

臣部

奏定西幹較省紆折惜潼蘭幹綫僅就起訖而定日後

實行測量如必須取道寶雞自不容過於墨守若第因

寶雞沃衍儘可相度形勢作爲西幹枝路似亦不至無

所裨益總之目下造路必資借款若軍用邊防之路關

係大局尤難置諸緩圖惟將來如何籌還本利如何防

守路綫皆須度支部陸軍部斟酌而後行度支部查潼
蘭歸新兩綫地段綿長需款極鉅欲圖籌還築路之費
必以將來收利之豐儉爲衡原奏雖稱物產豐富然必
待路成經營而後方有實利可收並非目前即可恃爲
的款現在議借外款均須先有抵押約計該兩路借款
總在壹萬萬以上近來借款過多幾於無可抵押不特
將來還款爲難卽論目前籌借辦法已非易易且修養
所需若長任賠墊亦屬不支該兩路關邊衛要政固須
亟築惟籌畫款項亦須策出萬全應俟籌有辦法後會
商郵傳部妥酌辦理所有遵議籌辦甘新鐵路緣由理

合恭摺會陳伏乞

皇上聖鑒訓示再此摺係郵傳部主稿會同度支部辦理合併聲明謹

奏 本月二十四日奉

旨

部臣迴避請

旨摺

宣統三年正月

奏爲奏

聞請

旨事竊臣部署左侍郎李經方與右丞李經楚係屬大功服兄弟查例載大功服兄弟係堂司令官小者迴避等語惟尙侍丞參例無迴避明文伏查宣統元年六月三十日民政部右參議紹彝奏本部尙書和碩肅親王善耆係屬妻兄十一月二十一日法部尙書廷杰與右參議善佺係屬舅甥均據實陳明奉

旨毋庸迴避欽此欽遵各在案今

臣

部右丞李經楚在

部有年臣等深資臂助應否迴避理合據實陳明請
旨遵行再臣部署左侍郎李經方例不列銜合併聲明
伏乞

皇上聖鑒訓示謹

奏 本月二十四日奉

旨李經楚著毋庸迴避欽此

交通銀行派員查帳摺

宣統三年正月

奏爲交通銀行關係重要擬照銀行通例派員查帳以防流弊而重財政恭摺仰祈

聖鑒事竊查

臣

部奏設交通銀行官股商股先後奏定

一千萬兩已收五百萬兩試辦已及三年詳閱章程第二十二條
二十條總理協理均聽郵傳部堂官命令第二十二條
另由部派出總稽查一員隨時赴行專司稽查之任此
員與總理協理均有稽查該行之責如前往各該行時
應將帳目現銀及貿易情形呈出核算第三十六條郵
傳部既認二萬股卽爲最大股東可以選派總理協理

由股東公舉董事四人爲稽核總管理處事務之員各等語是總理協理均由部選派雖屬營業性質部中擔負甚重歐洲美日均以銀行成敗與國家財政之得失商務實業之盛衰相爲倚伏而防弊之法尤以查帳一事爲最要關鍵如查帳之人切實可靠該銀行平日之報告單表白不敢稍有含糊向章六箇月卽須派人赴總行分行按法調查一無錯訛方能簽據呈覆故各國銀行商務無不鄭重查帳另有專門之學中國本無銀行而錢莊帳目雖亦有月結年結除西幫票號之外查帳均屬虛文卽如近年倒帳愈出愈奇官民均受重累

商務因之蕭索外交亦多一藐視

臣

愚以爲欲重財政

必興實業欲興實業必重銀行而銀行尤必以查帳爲
亟務交通銀行照章程商股有稽核四人內有二人應
歸臣部所派光緒三十二年十一月曾奏派左參議蔡
乃煌爲總稽核三十四年三月改派右丞那晉並派梁
士詒兼充宣統二年三月又札派外務部右丞曹汝霖
皆無實在查帳之事各國銀行通例查帳員必係每年
公舉且須親赴各分行實行細查現在外務部侍郎曹
汝霖內閣學士那晉既係大員兼有要差而交通分行
在外省者有十餘處斷難前往梁士詒今又開去差使

所有宣統二年該銀行結帳據報頗有盈餘自應派員查帳以徵實在除商股稽查應由各商股東會議公舉外臣部應派查帳員嗣後擬照各國銀行規則每年一舉本年卽由臣等趕緊選派嚴明廉介熟諳商務者馳往總分各行查帳如部中無此人才不得不在部外選擇臣部旣擔此重責一經查明倘有弊病自當分別重輕據實奏辦若果實有成效亦當擇尤保獎目下

國家財政之艱窘亟欲挽回則商務實業之振興庶有希望銀行實爲一大樞紐所擬改派查帳人員以昭慎重之處理合據實陳明是否有當伏乞

皇上聖鑒訓示謹

奏 本月二十七日奉

旨知道了欽此

奉直地方驗疫擬派醫隨車查驗摺

宣統三年正月

奏爲奉直地方籌辦驗疫完備

臣

部並已派醫隨車查

驗擬卽次第開車以期兼顧交通挽回權利而安人心
恭摺具陳仰祈

聖鑒事竊自上年東三省時疫流行蔓延關內迭奉
諭旨嚴密防範當將籌辦方法並暫停京奉火車情形
會同外務部民政部具奏陳明仰邀

聖鑒伏思各國防疫之法治本莫要於清潔衛生治標
莫亟於查驗消毒二者皆籌備於平時始克施行於臨
事其有必須遮斷交通者乃令有疫人與無疫人居處

隔離實未嘗停止舟車來往並無疫者而悉禁絕之也誠以查驗既經實行則疫氣既無傳染之虞自有消弭之效此次東三省鼠疫發生祇以中國向來防疫機關不備不得不暫停火車以爲急救嚴防之計迄今數月內外臣工欽遵

諭旨合力籌辦首以驗疫爲扼要方法奉直兩省經該督_臣奏明籌款設所分別留驗京城地方由民政部督率防疫局員診驗兼施倍形嚴密比以北洋開凍在即直隸督_臣復經訂定查驗船舶章程於水陸交通一律防範而京漢一路防疫南傳亦經湖廣督_臣設立驗疫

公所並臨時醫院分別辦理至車上驗疫之事係臣部
專責已經延聘專科洋醫及各醫院西學醫生分派京
奉京漢兩路隨車查驗如有疫病發見卽送各該地方
官醫院隔離診治沿途車站如有染疫未淨之處並飭
停售車票祇裝貨物以昭慎重現據各處報告疫氣日
漸消退詢之東西醫官僉謂天氣融和此疫自然衰滅
但此類傳染疫症起伏無常殊難逆料故外國有常備
防疫之謀而無久阻交通之法揆之周官月令亦言三
時逆疫懲前毖後必須講求衛生防疫標本並治雖不
免有經常之費而於國計民生兩有關係臣部計自京

奉火車停駛已將兩月僅就路利而言所失殆逾百萬
提還洋債本利益苦不支卽國家稅項人民商業隱被
損害尤難縷計坐視俄日鐵路行駛自如長此阻停不
特貽笑外人深恐以後動鑒前車則鐵路受損無窮必
至貽累國家殊非淺鮮現在驗疫機關漸臻完備自應
嚴飭在事人等分任責成切實辦理臣等與外務部民
政部暨奉直兩省督臣往復籌商意見相同並據督臣
陳夔龍函稱關內疫氣漸清除灤州昌黎北戴河三處
暫停售票其餘各站一律售票開車至關外續行開車
擬於瀋陽營口山海關各設留驗所驗明給照放行山

海關係直督轄屬已飭據司局擴充布置其瀋陽營口
兩處留驗所應由奉省辦理等語除已電奉天督臣錫
良等籌備並飭京奉路局遵辦外所有奉直地方籌辦
驗疫完備臣部並已派醫隨車查驗次第開車以期兼
顧而定人心緣由理合恭摺具陳伏乞

皇上聖鑒訓示謹

奏 本月 日奉

旨知道了欽此

山東省沿河電綫請准循舊管理摺

宣統三年二月

奏爲遵

旨查核具奏恭摺仰祈

聖鑒事內閣鈔出山東巡撫孫寶琦奏河工官電請循舊管理一片宣統二年十二月二十一日奉

硃批郵傳部查核具奏欽此原奏內稱東省河工從前報水遲緩前撫臣周馥於光緒二十八年奏明設立官電專司報水報工實與鐵路附設電綫無異與他省官電不同改歸部辦必多窒礙合無仰懇

天恩俯念河工爲保衛民生關係至重

飭下郵傳部俾東省河工官電仍准循舊管理至接綫收費一切均當遵部章妥慎舉辦等語臣等伏查電報爲軍國要圖必須事權統一乃能措施咸宜今山東巡撫以河工電綫改歸部辦必多窒礙爲言固屬慎重宣防起見但臣部統轄交通京外要政靡不由電傳達經營管理立法基嚴河工祇要政之一端改隸臣部自不至遽生窒礙況該省電綫創設之時係專指沿河兩岸近年以來復在東昌曹州鉅野鄆城濟甯等處展拓綫路增設局房已越河堤範圍核與鐵路專遞路務電報不收商報者又復不同惟臣等詳考各國成法凡關於

水利天文等事有准令民間私設專綫受國家法律之規定者東省本係官綫原非私設可比惟是河工關係民生與各國水利專綫同爲保衛治安自可變通辦理擬請將山東沿河大堤專司報水電綫准其仿照各國私設專綫之例由該省循舊管理其非沿河之電局仍必隸部以清界限至按綫收費各節容臣部核定章程咨行辦理恭候

命下卽由臣部行知山東巡撫遵照所有查核東省沿河電綫循舊管理緣由謹恭摺具陳伏乞

皇上聖鑒謹

奏 本月初七日奉

旨依議欽此

議復東省檢疫所經費無從協助摺

宣統三年二月

奏爲遵

旨議奏恭摺仰祈

聖鑒事宣統三年二月初十日軍機處片交欽奉

諭旨錫良電奏籌辦檢疫所及以後額支經費爲數不
貲請飭郵傳部酌量協助等語著郵傳部議奏欽此欽
遵到部原奏內稱鐵路爲營業性質設備不周疫氣傳
染該處之損失必多是防疫之事鐵路固應擔負惟同
屬

國家之事原無畛域之分是以前經郵部電商奉天車

站建築留驗所卽引爲己責嗣因舟車水陸處處應設
檢疫所同時並舉財力不繼今郵部奏定辦法自當遵
照勉爲其難迅速籌備惟開辦以後額支經費爲數不
貲路局平時旣獲利益有事似不能不爲分任可否

飭下郵傳部酌量協助等語查防疫爲地方行政此次
東省設備驗疫建築水陸各處檢疫所均需籌款辦理
爲數甚鉅自係實在情形該督以經費不貲擬請酌量
分任亦係萬不得已之舉京奉火車直達該省關繫尤
密如果臣部財力稍充可以挪撥斷無不設法協籌惟
自去冬京奉停車以後客貨不行損失殆逾百萬京漢

亦因驗疫大受影響現京奉雖經奏

准開行而瀋陽溝幫子營口各處以及山海關驗疫所
至今尚未落成仍難照常開駛且欲沿途留驗耽擱日
期行人皆有戒心而南滿洲鐵路即使如常行車而損失
叢箭淵魚之象則我關外鐵路即使如常行車而損失
之數尙不可以豫計加以延聘專科洋醫及各醫院西
學醫生購備器具藥料並分派京奉京漢兩路隨車查
驗人員需費亦屬不貲俱由兩路進款暫行支撥現計
京奉收入除營業支出外以之提還借款本息不敷甚
鉅尙不知如何籌措此次奉省防疫地方需用經費再

四籌思

臣

部實屬無從協助應請

飭下該督仍遵

臣

部前奏另行籌款辦理以重要政而

衛民生所有遵

旨議奏緣由理合恭摺具陳伏乞

皇上聖鑒訓示謹

奏 本月十七日奉

旨

第二次交通統計表并各政紀要繕冊呈進摺

宣統三年二月

奏爲編訂

臣

部第二次交通統計表并各政紀要辦理

完竣謹分繕十冊進呈

御覽恭摺仰祈

聖鑒事光緒三十三年內閣奉

上諭朕欽奉

懿旨本日憲政編查館奏請飭各省設立調查局各部
院設立統計處由該管堂官派定專員照該館所定表
式詳細臚列按期咨報以備刊成統計年鑑之用等因
欽此當卽奏設統計處遴派專員辦理於上年五月將

第一次統計表暨各政沿革概略分繕六冊進呈并隨摺聲敘卽行廣續籌辦第二次統計奉

旨憲政編查館知道表冊併發欽此欽遵各在案伏維統計之設原就已往成績以作後來考鏡之資辦理統計貴在循序求精以收逐漸改良之效臣部所主各政端緒繁賾款目糾紛營業之消息盈虛工程之遲速緩急凡茲交通所係旣月異而歲不同則統計成編似宜由簡而求其密臣等竊本斯意隨時督率該處總辦林炳章暨各課員悉心鉤稽縱橫貫串編覈必期翔實採輯尤冀精詳計第二次成表其五百三十有七中屬總

務之表凡十船政之表凡九十二路政之表凡二百零一電政之表凡二百郵政之表凡三十四比較前次約增三分之一蓋第一次統計於各表之外附以沿革意在使閱者洞曉源流便於參考今茲之接續編訂並將四政重大之端輯爲紀要弁於卷首使表所難盡者有紀要以相發明紀要所不詳者有表以資考校庶幾溯委窮源推行有準藉以仰副

聖主注重交通之至意除將第二次交通統計表暨各政紀要印發有關交通各局所及京外各衙門並督飭該處司員將第三次統計認真廣續辦理外理合繕具

黃冊進呈

御覽所有編訂臣部第一次統計表暨各政紀要緣由

恭摺具陳伏乞

皇上聖鑒謹

奏 本月十七日奉

旨

臚陳本部第五屆籌備成績摺

宣統三年三月

奏爲遵章臚陳本部第五屆籌備成績恭摺仰祈

聖鑒事竊查憲政編查館奏定考核章程內開九年籌備事宜責成內外臣工每屆六箇月將籌備成績臚列奏聞並咨館查核等因所有臣部九年籌備事宜暨歷屆成績迭經奏咨在案茲值第五屆奏報之期自應遵章臚陳以符憲政伏維臣部所轄路電較繁而路政一

門尤以測勘建築二者爲先務其測勘者曰滇桂曰滇

緬曰滇蜀該綫於西南邊防關係緊要業經臣等揀派

熟悉工程之員前往履勘一面由部與雲貴督臣廣西

撫臣往復電商俟有端倪當再另案辦理其建築者一
曰吉長一曰張綏一曰廣九一曰津浦吉長自上年冬
閒卡倫通車後旋即敷軌至土門嶺運料業已暢行總
計長春段早經竣工吉林段因鼠疫停工現於三月初
一日開工已催令速即蒧事張綏自興築以來其張口
天鎮之閒所有橋梁涵洞車站房屋月臺岔道各工已
成者約十分之七而敷軌已抵於柴溝堡去冬因詹天
佑前赴川粵款亦不敷暫行停工現已籌款另調工程
司再行續籌開辦廣九則首段二十九英里業經售票
計全路土方橋梁各役一律完工枕木石渣工亦屬半

津浦則准該督辦大臣咨稱北段自津站與京奉銜接以後津德行車進款日見增多其德州濟南間早已通車雖於黃河岸傍預備渡船以資接濟而所有橋臺橋墩各事現正趕緊施工渡河而南至於泰安亦經售票開車南段自滁州以南敷軌已抵臨淮關蚌埠橋工挖築過半固鎮宿州之軌料車亦已通行至路律中之車務公司兩編及部定車務章程所有草案甫經告成仍當另案分別奏明以符原案此

臣部籌備路政之情形也電政一門亦以展設修理分爲兩類其展設者於河南則由許州達潞潯於山東則由城陽達卽墨於安徽

則由蕪湖達屯溪於湖南貴州之間則由晃州達銅仁其修理者在直隸則有京師至張家口之綫有天津至大沽郎房馬廠之綫在徽則有正陽關至壽州之綫在川則有瀘州至敘州之綫在粵則有石龍至沙面之綫在贛則有梅嶺至驛南之綫而粵贛間復有韶州至梅嶺之綫在齊豫則有濟甯至開封之綫在閩浙則有紹興至延平之綫在湘鄂則有永州至武昌之綫綜計全數更達七千里有奇此臣部籌備電政之情形也至船郵二政因理船廳及郵政局尙未移交無從恢擴然船政於船務之如何設備船員之如何考驗早經飭司擬

章試辦現已粗有規模郵政因郵電合一起見亦已派員出洋考察郵便儲金各法以期逐漸實行此臣部籌備船郵兩政之情形也以上各節或以前功未竟正待經營或以政策所關諸須規畫此尤臣等所爲所夕焦思不敢不勉竭愚忱者也所有遵章臚陳臣部第五屆籌備成績緣由除分咨外謹恭摺具陳伏乞

皇上聖鑒謹

奏 本月初八日奉

旨

擬訂大東大北電報公司預付報費合同摺

宣統三年三月度

支部會奏

奏爲擬訂大東大北電報兩公司預付報費合同恭摺
會陳仰祈

聖鑒事竊郵傳部統籌電政光緒三十四年奏請收贖
電報商股計共需銀三百八十餘萬兩迄今尙未清還
近來推廣電綫改良電話所費尤鉅加以接管各省官
電亟應大修桿綫以期暢達臣等通籌全局目前電政
入款僅敷常年經費之用自應另行設法以濟要需飭
據電政局總辦候選道周萬鵬稟稱大東大北公司向

在中國辦理海纜訂有接纜合同該兩公司允將中國電局應得攤分外洋報費預付英金五十萬鎊年息五釐分二次交付第一次付英金三十萬鎊於合同簽立之日起一箇月內交付第二次付英金二十萬鎊於第一次款交清後六箇月內交付每半年均勻付還公司一次其第一期還款訂明於宣統四年五月十六日交付共十九年分三十八期每期本息英金二萬一千十八鎊磋商擬合同七款呈部前來臣等詳查合同大指係將電局應得攤分外洋報費由該兩公司提前預付卽將攤分報費擔保似與別項借款另索抵押者情形不

同其以十成交款不折不扣亦尙合算至分期還款數目核與按年所得攤分報費之數不相上下計算此十九年中本息必可如期清償既應目前之急需復杜將來之干涉自可照擬辦理當將合同擬稟咨行外務部查核茲准覆稱合同擬稟業已查核等因謹繕具擬訂合同七款清單恭呈

御覽候

命下之日卽由郵傳部欽遵辦理並分咨外務部照會駐京英國及俄丹公使查照所有擬訂大東大北兩公司預付報費合同緣由謹恭摺會陳伏乞

皇上聖鑒再此摺係郵傳部主稿會同度支部辦理合
并陳明謹

奏 本月初八日奉

旨依議單併發欽此

密陳大東大北公司預付報費用款情形片

宣統三年三月

再郵傳部此次擬訂大東大北兩公司預付報費合同其用款情形謹爲我

皇上縷晰陳之查光緒三十四年奏請收贖電報商股計其用銀二百八十餘萬兩此項銀兩係在鐵路訂借匯豐匯理款內暫行撥用陸續由電政盈餘內隨時歸還截至宣統二年年底止未還之款計銀一百八十萬兩息銀在外現在張綏鐵路停工待款需用孔亟萬難久懸自應設法加數清還俾路工藉資興辦又上年九

月奏明郵政應由

臣

部收回欽奉

諭旨依議欽此。臣等再四思維郵政爲交通四政一大端實未便再事遲回但必須籌有的款方能定期接辦加以本年正月接收各省官電亟須大修桿線需款亦屬浩繁約略估計目前至少需銀二百萬兩連同清還贖電借款本息共約需銀四百萬兩此時急切待用而別項借款又恐損失利權因念臣宣懷從前督辦電政時曾與大東大北兩公司訂立合同凡由公司海線所得出洋報費須與中國攤分嗣後接續辦理綜計每年分得之款約洋四十餘萬元今商由該兩公司將此項攤分外洋報費提前預付五十萬鎊合銀四百萬兩適

合現時應用之數而分期還款數目卽以每年應得攤分之費抵還本息便可清楚是使從前商線歸於國有之資本盡出於此又有餘款可作整理電報及收回郵政創辦經費似於

國家要政大有裨益且此項預付辦法取利旣輕而以十成交款不折不扣並無須他項財政抵保尤爲向來借款所無臣等公同商酌確係毫無流弊惟合同所載係爲整頓電報電話之用而用款情形尙須兼顧路郵兩政理合附片密陳伏乞

聖鑒謹

奏 本月初八日奉
旨

改派交通銀行總理幫理片

宣統三年三月

再據臣部右丞兼充交通銀行總理李經楚呈稱曩承先業股開義善源銀號營業多年現因市面緊急亟須清理惟該號分設多處擬卽自行前去盤查懇准賞假一個月等情當經批准並飭將經手未完事件責成清理在案查交通銀行總管理處有調度各分行之責事繁任重一時慎選頗難其人現當開會之期清查舊帳整頓新章均關重要所有總理一差未便久懸應請將李經楚開去銀行總理差使查有山西候補道周克昌前在奉天辦理官銀號著有成效且曾充交通銀行協

理熟悉商務擬派令先行接管該銀行總理事務如果
試辦有效再行奏明充補協理陸宗輿辦理尙屬妥協
仍當飭令和衷會辦又交通銀行幫理梁士詒前經奏
准開去差使查有奏留奉天候補知府巢鳳岡精核安
詳擬派爲該銀行幫理如蒙

俞允再行飭令該員等到差臣等並隨時督飭認真整
頓以期掃除積弊而固本源所有遴員接辦交通銀行
事務緣由謹附片具陳伏乞

聖鑒謹

奏 本月初八日奉

旨知道了欽此

籌辦商船學校大概情形摺

宣統三年三月

奏爲設立商船學校謹將籌辦大概情形恭摺具陳仰
祈

聖鑒事竊維商務振興必藉航業航業發達端賴人材
通商以來洋船輻輳內河外海門戶洞開我國地居大
陸不習海事雖有輪船招商局僅通域內未涉重瀛管
駕各員且皆借材異地三年蓄艾今爲要圖

臣部管理

全國航業責無旁貸故於歷屆籌備憲政摺內兢兢以
建設商船學校爲船員之需意實在此正擬相度地勢
剋日經營旋准

臣

部上海高等學堂監督前農工商部

左侍郎唐文治咨稱翰林院修撰張謇願將上海吳淞口漁業公司地基並所領官款六萬元呈送臣部辦理商船學校復准籌辦海軍大臣咨稱浙紳李厚祐報効甯波益智中學堂一所奏明預備臣部商船學校之用先後咨交前來當卽派員前往吳淞甯波兩處履勘地址籌議辦法據稱吳淞江面寬闊各國商船絡繹往來地居南北之中交通至便毗連濬浦局船澳建築船校爲天然適當之區甯波益智中學堂左帶甬江海舶時至校舍崇閩占地爽塏甬民習於水性招生尤爲合宜兩地均堪備用等情臣等公同商酌竊以中國幅員廣

大海岸延長果能於吳淞甯波同時並舉規模愈遠成材愈多洵爲盛事惟商船學理深邃程度極高一旦兩校兼營不獨財力維艱且恐教習學生均難應選不若併力先辦吳淞一處較易觀成查臣部上海高等實業學堂於路電兩科外已設立高等船政專科惟人數不多擬卽就此擴充添招學生名數以爲商船學校之基礎一面在吳淞建築校舍俟工竣後將學生移入該校並歸上海高等實業學堂監督管理以期接洽而昭簡易其甯波益智學堂所有房屋地基均應作爲船校產業將來或改爲商船中學當視日後之款項人材以爲

進退此時暫從緩辦至學科辦法前經咨商出使大臣
調查各國船校現辦章程以資仿效並查考留學商船
之學生預備任使現已陸續咨復到部應卽參酌損益
輪派妥員辦理務求至當計開辦時建築房屋購買輪
船帆船書籍彝器以資練習用費尤鉅原估開辦經費
二十萬兩常年經費十三萬兩業於上年冊報資政院
查核在案惟目下情形臣部財力甚形拮据而開辦尤
難遲緩不得不先籌一半卽行試辦擬暫定開辦經費
十萬兩常年經費六萬兩將來籌有的款再行隨時設
法擴充辦理除俟漁業公司交到官款六萬元撥充開

辦經費外其餘擬均在臣部經費項下撙節動支恭候
命下臣部欽遵辦理所有擬設商船學校大概情形緣
由謹恭摺具陳伏乞

皇上聖鑒訓示謹

奏 本月十八日奉

旨

上海實業學堂購置民屋地畝需用銀兩片

宣統三年三月

再准上海實業學堂監督前農工商部左侍郎臣唐文治咨稱現在本學堂舊有生徒七百餘名校舍業經額滿卽通學生於附近房屋亦租賃無遺今年招考商船學校學生及本學堂新班至少亦有二百數十名恐難位置查本校對門有通合公司產業計絲廠一所又毗連民屋九十餘間計地十三畝有奇情願出售索值四萬餘兩請加撥應用等語查該堂在上海徐家匯地本偏僻賃屋甚難通學生負笈遠遊諸多不便此處房屋地段旣與該堂相近若經外人購去且恐輾轉易滋於

管理學生尤多妨礙不如自購爲學堂公產現在船校招生既有居處之地將來移入新校亦可騰出此項房屋租與未來之通學生既得租金且便管理實爲兩益已由臣部照准撥給事關款項理合附片陳明伏乞聖鑒謹

奏 本月十八日奉

旨

愚齋存稿卷第十九